

金

文

最

金文最卷四目錄

詔令 附張邦昌劉豫偽詔

招宋吳曦詔 泰和六年

遣諭布薩揆詔 泰和六年

命完顏匡攻宋襄陽詔 泰和六年

命徒單鎰節制陝西元帥府詔 泰和六年

諭完顏承裕詔 泰和六年

賜張行簡御札 泰和七年

責布薩端薦妖婦阿魯不斡兩詔 泰和七年

以衛王子按陳爲鄭王永蹈後賜衛王詔 泰和七年

命按陳爲鄭王後詔 泰和七年

許宋平報完顏匡詔 泰和七年

諭陝西軍士詔 泰和七年

戒諭尙書省詔 泰和八年

章宗遺詔

泰和八年

章宗承御范氏胎氣損失詔

大安元年

賜章宗元妃李氏承御賈氏自盡詔

大安元年

允高麗元孝王權守軍國詔

崇慶元年

冊命高麗元孝王詔

崇慶元年

諭愛王詔

天定元年

立守忠爲皇太子詔

貞祐元年

放還章宗元妃李氏家族詔

貞祐元年

議南遷詔

貞祐二年

罪已詔

貞祐二年

諭鄂屯襄布希萬努富察烏錦協力詔

貞祐二年

諭中都官吏軍民詔

貞祐三年

獎諭河東南路宣撫使胥鼎詔

貞祐三年

報完顏仲元請詣闕詔

貞祐四年

以上原列卷七

賜滄海公王福等詔

典定四年

誅布薩阿海詔

典定五年

諭陝西東西兩路行省詔

宣宗時

見文雅

哀宗卽位大赦詔

哀宗元光二年

戒諭百官詔

正大元年

卻貢白兔詔

正大元年

擬立東宮詔

正大元年奉都堂鈔旨作

諭止胥鼎請老詔

正大三年

遣完顏阿虎帶使宋借糧詔

天興二年

答胡士以奴降乞解軍職詔

天興二年

曲赦蔡州詔

天興二年

張邦昌僭位偽手書

張邦昌赦京城偽手書

張邦昌偽赦手書

劉豫僭位肆赦偽詔

劉豫求言偽詔

劉豫改元阜昌偽詔

劉豫遷都汴京偽詔

劉豫寇宋偽詔

劉豫獎諭羅誘偽詔

劉豫戒守令勸農偽詔

劉豫除李成鎮海軍節度使偽詔

以上原列卷八

金文最卷四

昭文張金吾月霄

詔令

附張邦昌劉豫偽詔

招宋吳曦詔

泰和六年

宋自佶桓失守構竄江表僭稱位號偷生吳會時則乃祖武安公  
玠捍禦兩川洎武順王璘嗣有大勳固宜世胄大帥遂荒西土長  
爲藩輔誓以河山後裔縱有樂麤之汰猶當十世宥之然威略震  
主者身危功蓋天下者不賞自古如此非止於今卿家專制蜀漢  
積有歲年猜嫌旣萌進退維谷代之而不受召之而不赴君臣之  
義已同路人譬之破桐之葉不可以復合騎虎之勢不可以中下  
矣此事流傳稔于朕聽每一思之未嘗不當饋歎息而卿猶偃然  
自安且卿自視翼贊之功孰與岳飛飛之威名戰功暴於南北一  
旦見忌遂被參夷之誅可不畏哉故智者順時而動明者因機而  
發與其負高世之勳見疑於人惴惴然常懼不得保其首領曷若

順時因機轉禍爲福建萬世不朽之業哉今趙擴昏孱受制強臣  
比年以來頓違誓約增屯軍馬招納叛亡朕以生靈之故未欲遽  
行討伐姑遣有司移文復因來使宣諭而乃不顧道理愈肆憑陵  
虔劉我邊陲攻剽我城邑是以忠臣扼腕義士痛心家與爲讎人  
百其勇失道至此雖欲不亡得乎朕已分命虎臣臨江問罪長驅  
並驚飛渡有期此正豪傑分功之秋也卿以英偉之姿處危疑之  
地必能深識天命洞見事機若按兵閉境不爲異同使我師并力  
巢穴而無西顧之虞則全蜀之地卿所素有當加封冊一依皇統  
冊構故事更能順流東下助爲犄角則旌麾所指盡以相付天日  
在上朕不食言今送金寶一鈕至可領也

金史

遣諭布薩揆詔

泰和六年

前得卿奏先鋒已奪潁口偏師又下安豐斬馘之數各以萬計近  
又西師告捷棗陽光化旣爲我有樊城鄧城亦自潰散又聞隨州  
闔城歸順山東之眾久圍楚州隴右之師刻期出界卿提大兵攻

合肥趙擴聞之料已破膽失其神守度彼之計乞和爲上昔嘗畫  
三事付卿以今事勢計之徑渡長江亦其時矣淮南旣爲我有際  
江爲界理所宜然如使趙擴奉表稱臣歲增貢幣縛送賊魁還所  
俘掠一如所諭亦可罷兵卿宜廣爲渡江之勢使彼有必死之憂  
從其所請而縱之僅得餘息偷生豈敢復萌他慮卿於此時經營  
江北勞休安集除其虐政橫賦以良吏撫字疲民以精兵分守要  
害雖未係趙擴之頸而朕前所畫三事上功已成矣前入見時已  
嘗議定今復諄諄者欲決卿成功爾機會難遇卿其勉之

金史

命完顏匡攻宋襄陽

詔泰和六年

陝西一面雖下四州吳曦之降朕所經略自大軍出境惟卿所部  
力戰爲多方之前人無所愧謝今南伐之事責成卿等區區俘獲  
不足羨慕果能爲國建功豈止一身榮寵後世子孫亦保富貴

金史

命徒單鑑節制陝西元帥府詔

泰和六年



將帥雖武悍久歷行陣而宋人狡獪亦資算勝卿之智略朕所深  
悉且股肱舊臣故有此寄宜以長策禦敵厲兵撫民稱朕意焉

金史

諭完顏承裕詔

秦和七年

昔乃祖乃父戮力戎旅汝年尙少善於其職故命汝與完顏璘同  
行出界汝自言得兵三萬足以辦事今以石秫仲溫尤虎高琪及  
青宜可與汝軍相合計可六萬斯亦足以辦矣仲溫高琪兵道險  
阻汝兵道甚易也自秦州至仙人關纔四百里耳從長計畫以副  
朕意

金史

賜張行簡御札

秦和六年

朕念鎬鄭二王誤于天常自貽伊戚藁葬郊野多歷年所朕甚悼  
焉欲追復前爵備禮改葬卿可詳閱唐貞觀追贈隱巢并前代故  
事密封以聞又欲使石古乃於威州擇地營葬歲時祭奠兼命衛  
王諸子中立一人爲鄭王後謹其祭祀此事旣行理須降詔卿草

詔文大意一就封進

金史

責布薩端薦妖婦阿魯不祈兩詔

泰和七年

昔者所奏今其若何後人謂朕信其妖妄實由卿啟其端倪鬱于子懷念之難置其循省于往咎思善補于將來恪整乃心式副朕意

金史

以衛王子按陳爲鄭王永蹈後賜衛王詔

泰和七年

朕念鄭王自棄天常以千國憲蕞瘞曠野忽諸不祀歷歲旣久深用愴然親親之情有懷難置已詔追復舊爵改葬如儀稽考古禮以卿之子按陳爲鄭王後謹其祭祀卿其悉之

金史

命按陳爲鄭王後詔

泰和七年

朕追維鄭邸誤蹈匪彝藁窆原野多歷歲年怛然軫懷有不能已乃詔追復王爵備禮改葬今稽式古典命汝爲鄭王後守其祭祀

金史

許宋平報完顏匡詔

泰和七年

朕以生靈之故已從請稱臣割地尙且闕略區區小節何足深較其侂冑師旦首函及諸叛亡至濠州卽聽通謝人使入界軍馬卽當撤還川陝關隘候歲幣犒軍銀兩至下蔡劃日割賜

金史

諭陝西軍士詔

泰和七年

汝等爰自去冬出疆用命擐披甲冑冒涉艱險直取山外數州比之他軍實有勤效界外屯駐日久負勞苦恩賞未行有司申奏不明以致如此朕已令增給賞物以酬爾勞惟是餘賊未殄猶須經略眷我師徒久役未解深懷憫念寤寐弗忘汝等益思體國之忠奮敵愾之勇協心畢力建立功勳高爵厚祿朕所不吝

金史

戒諭尙書省詔

泰和八年

國家之治在于紀綱紀綱所先賞罰必信今迺上自省部之重下逮司縣之閒律度弗循私懷自便遷延曠歲苟且成風習此爲恆從何致理朝廷者百官之本京師者諸夏之儀其曷自今各懲已往遵繩奉法竭力赴功無枉撓以徇情無依遠而避勢壹歸于正

用範乃民

金史

章宗遺詔

泰和八年

皇叔衛王承世宗之遺體鍾厚慶於元妃人望所歸歷數斯在今朕上體太祖皇帝傳授至公之意付昇寶祚卽皇帝位於柩前載惟禮經有嫡立嫡無嫡立庶今朕之內人見有娠者兩位已詔皇弟如其中有男當立爲儲貳如皆是男子擇可立者立之

金史

章宗承御范氏胎氣損失詔

大安元年

章宗皇帝以天下重器界于眇躬遺旨謂掖庭內人有娠者兩位如得男則立爲儲貳申諭多方皎如天日朕雖涼菲實受付託思克副于遺意每曲爲之盡心擇靜舍以俾居遣懿親而守視欽懷皇后母鄭國公主及乳母蕭國夫人晝夜不離昨聞有爽于安養已用軫憂而弗甯爰命大臣專爲調護今者平章政事僕散端左丞孫卽康奏言承御賈氏當以十一月免乳今則已出三月來事未可度知范氏產期合在正月而太醫副使儀師顏言自年前十

一月診得范氏胎氣有損調治迄今脉息雖和胎形已失及范氏自願於神御前削髮爲尼重念先皇帝重屬大事豈期聞此深用怛然今范氏旣已有損而賈氏猶或可冀告於先帝願降靈禧默賜保全早生聖嗣尙恐眾庶未究端由要不匿於播敷使咸明於吾意

金史

賜章宗元妃李氏承御賈氏自盡詔

大定元年

近者有訴元妃李氏潛計負恩自泰和七年正月章宗暫嘗違豫李氏與新喜竊議爲儲嗣未立欲令宮人詐作有身計取他兒詐充皇嗣遂於年前閏月十日因賈承御病嘔唾腹中若有積塊李氏與其母王盼兒及李新喜謀令賈氏詐稱有身俟將臨月於李家取兒以入月日不偶則規別取以爲皇嗣章宗崩謀不及行當先帝彌留之際命平章政事完顏匡都提點中外事務明有敕旨我有兩宮人有娠更令召平章左右並聞斯語李氏并新喜乃敢不依敕旨欲喚喜兒鐵哥事旣不克竊呼提點近侍局烏古論慶

壽與計因品藻諸王議復不定知近侍局副使徒單張僧遣人召平章已到宣華門外始發勒同平章入內一遵遺旨以定大事方先帝疾危數召李氏李氏不到及索衣服李氏承召亦不卽來猶與其母私議先皇平昔或有幸御李氏嫉妬令女巫李定奴作紙木人鴛鴦符以事魘魅致絕聖嗣所爲不軌莫可殫陳氏旣發露遣大臣按問俱已款服命宰臣往審亦如之有司議法當極刑以其久侍先帝欲免其死王公百僚執奏堅確令賜李氏自盡王盼兒李新喜各正典刑李氏兄安國軍節度使喜兒弟少府監鐵哥如律仍追除復係監籍於遠地安置諸連坐並依律令施行承御賈氏亦賜自盡

金史

允高麗元孝王權守軍國詔

崇慶元年

朕惟爾國世爲忠勤意前王遽以病讓謂爾乃仲父之子而素有象賢之稱徵遺訓於先臣俾攝行於機務已頒答詔特示矜從茲查閱於來章宜明諭於朕指其承恩許益謹藩儀續當遣使冊命

冊命高麗元孝王詔

崇慶元年

邇者前王乃以國讓謂卿賢淑祈受世封肆臨遣於使輶俾就加於錫命益思忠恪茂對寵光今差正使明虎大將軍大理寺完顏惟基副使翰林直學士大中大夫張翰往彼冊命仍賜卿車服金印匹段弓箭鞍馬等物具如別錄

高麗史

諭愛王詔

天定元年

泰和猜忌兄弟失歡骨肉至親化爲讎怨誘引外敵傾危本國計王之心亦復何忍往事已矣今宜改圖朕遭家多難靖晦以處忽諸父諸臣橫見推逼義不容辭王是朕之姪朕是王之叔叔姪天性甯不坦然今自和龍東北永爲王國保有北朔子孫嗣守勿信閒言憑陵以逞叔姪二人同形共氣設或交兵務行兼井太祖太宗在天之靈亦不錫佑昔梁嘗與湘東爲叔姪之仇嘗誘周兵以陷江陵隨亦失國而爲人僂此事宜鑒三復予言

大金國志參南

立守忠爲皇太子詔

貞祐元年

朕以眇躬嗣服景命念祖宗之遺統方夙夜以靡遑將上以承九廟之靈而下以繫多方之望皇太子守忠性秉溫良地居長嫡以次第言之則宜升儲貳以典禮質之則足愜羣情其立爲皇太子

金史

放還章宗元妃李氏家族詔

貞祐元年

大安之初頒諭天下謂李氏與其母王盼兒及李新喜同謀令賈氏虛稱有身各正罪法朕惟章宗皇帝聖德聰明豈容有此欺紿近因集議武衛軍副使兼提點近侍局完顏達霍王傅大政德皆言賈氏事內有冤此時達職在近侍政德護賈氏所以知之朕親臨問左證其事曖昧據當時被罪貶責者可俱令放免還家

金史

議南遷詔

貞祐二年

國有大事謀貴僉同我太祖效文王之興岐居龍朔以有天下忠



獻繼周公之卜洛宅中京以朝諸侯頃歲多虞兵端未已臣鄰思  
久遠之圖國人懷固本之思盍各進言以圖長策

大金國志

罪已詔貞祐二年

一人无良萬方何罪興言及此流涕奚從朕方圖大以宅中期與  
更新而沐化劉伯林李斌楊安兒王燕張耀等或嘗經任使或曾  
經征行偶此失圖遂迷故道朕念先皇之興起尙合南北於一家  
胡爲今日之紛張遂化仇讎于同軌倘使翻然順命必將加以厚  
恩朕不食言爾當敬聽

大金國志

諭鄂屯襄布希萬努富察烏錦協力詔貞祐二年

上京遼東國家重地以卿等累效忠勤故委腹心意其協力盡公  
以徇國家之急及詳來奏乃大不然朕將何賴自今每事同心并  
力備禦機會一失悔之何及且師克在和善鈞從政尙懲前過以  
圖後功

金史

諭中都官吏軍民詔貞祐三年

朕欲紓民力遂幸陪都天未悔禍時尚多虞道路久梗音問難通  
汝等朝暮矢石暴露風霜思惟報國靡有二心俟兵事之稍息當  
不愆於旌賞今已會合諸路兵馬救援故茲獎諭想宜知悉

金史

獎諭河東南路宣撫使胥鼎詔

貞祐三年

卿以文武之才膺兵民之寄往鎮方面式固邊防坐釋朕憂孰如  
卿力益懋忠勤之節以收綏靖之功仰副予心嗣有後寵

金史

報完顏仲元請詣闕詔

貞祐四年

卿兄弟鳩集義旅所在立功忠義之誠皎然可見朕以參政侯摯  
與卿素厚命于彼中行省應悉朕心卿求入見其意固嘉東平方  
危正賴卿等相爲聲援俟兵勢稍緩卽徙軍附河屯駐此時卿來  
蓋未晚也尙思戮力朕不汝忘

金史

以上原列卷七

賜滄海公王福等詔

興定四年

乃者邊防不守河朔失甯卿等自摠戎昭備殫忠力若能自效朕  
復何憂宜膺茅土之封復賜忠臣之號除已畫定所管州縣外如

能收復鄰近州縣者亦聽管屬

金史

誅布薩阿海詔

典定五年

銀青榮祿大夫左副元帥兼樞密副使駙馬都尉僕散阿海早藉世姻寢馳仕規屬當軍旅之事益厚朝廷之恩爰自帥藩擢居樞府頃者南伐時乃奏言是俾行鱗介之誅而盡露梟獍之狀二城雖得多罪稔彰念勝負之靡常肯刑章之輕用始自畫囚糧之計乃更嚴橫斂之期督促計司彫弊民力信其私意或失防秋顧利害之實深尙優容而弗問頃因近侍悉露姦謀蓋虞前後罪之上聞迺以金玉帶而夜獻審事情之詭秘命信臣而鞠推迨致款詞乃詳實狀自以積愆之著必非公憲所容欲結近臣之歡心俾伺內庭之指意如蠶端之少露得先事而易圖因其方握兵權得以謀危廟社事或不濟計卽外奔前日之俘隨時誅戮獨於宋族曲活全門示其悖德於敵讎豫計全身而納用

金史

哀宗卽位大赦詔

哀宗元光二年

朕述先帝之遺意有便於時欲行而未及者悉奉而行之國家已有定制有司往往以情破法使人罔遭刑憲今後有本條而不遵者以故入人罪罪之草澤士庶許令直言軍國利害雖涉譏諷無可采取者並不坐罪

金史

戒諭百官詔 正大元年

朕新卽大位肇親萬機國是實爲未明政統猶懼多闕尙賴爾文武多士內外庶僚上下同心始終戮力以副遺大投艱之託共成興滯補廢之功然而養資考者每務於因循嗜閒逸者或託於疾病因之積弊習以成風事至於斯朕將何賴蓋嘗深維百姓勤營之意尙能不念累聖涵養之仁服田力穡而以給租庸輓粟飛芻而不憚征繕况爾等世膺高爵身受厚恩夫有國乃可以有家而爲臣亦猶之爲子未有國不安而家可保必須臣竭力而君以甯加之事屬方殷時丁多故舊疆待平恢復強敵期于削平正當經營之秋難行姑息之政朕旣夙宵軫念庶幾宏業以昭功爾其朝

夕在公豈宜翫歲而愒日夫湯刑以儆具位周典以正百官茲出  
讜言爲明訓掌刑者有法可奉毋使有冤抑之情典選者有格可  
修毋妄求疏駿之節錢穀當審知取予毋吝于出納之門臺諫當  
指陳是非毋涉于細碎之事司農以敦本察吏不可苟且而曠職  
司牧民以扶弱抑強不可聚斂而營私計至於大而分閭小而掌  
兵固當志殄寇讎日闢土宇受朝廷之託必思報國念功臣之後  
常恐辱先又豈可平居或冒於糗糧臨事或生於畏懼視郡縣之  
官妄分於彼此役部伍之卒不計於公私凡有我官所當其戒其  
敬遵於邦憲務恪慎於官箴享富貴於當年垂功名於身後且賞  
罰期於信必而功罪貴乎正明茲誠前代之良規亦我祖宗之已  
事今當仰法要在決行於戲任賢使能周室果聞於興復綜名核  
實漢家遂至於肅清公勤者賞不敢私弛慢者刑茲無赦各勤爾  
職明聽朕言故茲詔示想宜知悉

御貢白兔詔

正大元年

玉堂嘉話

得賢臣輔佐年穀豐登此上瑞也焉事此爲令有司給道里費縱之本土禮部其徧諭四方使知朕意

金史

擬立東宮詔

正大元年奉都堂鈞旨作

惟王建國篤爲長世之謀惟國立儲茂正萬邦之本位號定而莫不以爲悅典禮崇而莫敢以爲私眷予上嗣之良優有中興之略內則視膳問安之禮備外則尊道讓齒之義隆藹然仁孝之稱粹矣溫文之表朕自紹休於大統猶虛位于東朝乃考蒼龜之占乃稽方冊之寶夏后與子天人之望攸歸周家尙親廟社之尊斯在載涓穀旦爰闢青宮下以副四海之心上以對兩宮之訓某可立爲皇太子於戲文昭武穆夙貽燕翼之謀震長離明本有承華之象尙因主鬯之重嗣啟迓衡之期

遺山集

諭止胥鼎請老詔

正大三年

卿往在河東殘破孤危殆不易保卿一至而定迄卿移鎮敵不復侵何乃過爲嫌避且君臣均爲一體朕待下亦豈自殊自外之語

殆爲過計況餘人才力孰可副卿者卿年老久勞於外朕豈不知但國家百年積累之基河朔億萬生靈之命卿當勉出壯圖同濟大事

金史

遣完顏阿虎帶使宋借糧詔

天興二年

宋人負朕深矣朕自卽位數戒邊臣無擾邊界邊臣有自請討伐者朕未嘗不切責之向得州民隨卽見付近日淮陰來歸彼欲多輸錢帛爲贖朕若受財是貨之也秋毫不犯付以全城清口臨陣生獲數十人悉以資糧遣之今乘我困弊據我壽泗旣誘我鄧州又攻我唐州雖然彼所以爲謀亦淺矣敵人滅國四十以及於夏夏亡則及於我我亡則及於宋脣亡齒寒自然之理耳爲彼之計不若與我連和同體大敵所以爲我者亦爲彼也卿至其以此意曉之

汝南遺事參金史

答胡士以奴降乞解軍職詔

天興二年

卿父子兄弟皆爲帥臣榮被國恩不爲不厚願卿豈有求降理耶

卿在洛陽不卽投降而千里遠來降於蔡亦豈人情也哉聞卿遇  
奴太察且其衣食不甚豐腆此自奴輩往求飽煖計耳卿何嫌爲  
哉汝南遺事

曲赦蔡州詔天興二年

天方悔禍少寬北顧之憂人亦告勞爰啟南巡之議惟今蔡郡實  
古豫州干戈以來市井如故久以孤墉而抗敵出于眾力之輸勤  
爰聞臨幸之初逾謹奉迎之禮人已至於垂淚朕亦爲之動懷宣  
沛恩私曲加慰浣自天興二年七月一日昧爽以前據蔡州管內  
支郡屬縣雜犯死罪以下並行釋免官吏軍民各覃恩兩重歸德  
以南經過去處曾經應辦者遷一官百姓逃亡戶絕者拋下地土  
聽人恣耕並免差稅自來拖欠官房地基軍需等錢俱免追徵連  
年兵飢多有暴露骸骨仰所在官司如法埋瘞嗚呼牽畜爾眾敢  
辭毫邑之遷時邁其邦尙獲周家之助咨爾有眾體予至懷故茲  
詔示想宜知悉大金國志參汝南遺事



張邦昌僭位偽手書

予以寡陋近迫大國之威俾救斯民於兵火而諸公橫見推逼不容自裁忍死以理國事豈其心哉顧德弗類實難稱塞出令之初有司乃以聖旨行下載循昧陋殊震危衷夫聖孔子不居則子豈敢自今與三省樞密院議定處分及內外官司面陳得旨事稱面旨內降及批出文字稱中旨遣官傳諭所司稱宣旨洪惟非常之變適遭會於斯時尚冀有永之圖訖救甯於區夏庶幾多士共識此懷

北盟會編參靖康要錄

張邦昌赦京城偽手書

嗣位之初理宜廣推恩沛今四方道路未通赦宥未能宣布緣京城圍閉日久下項事可以先次施行應在京罪人所犯無輕重不論已未發覺常赦所不原者並與釋放應文臣承務郎武臣承信郎以上并內臣及致仕官並與轉官在職選人循資校尉比類施行令磨勘者仍並不隔磨勘應文武陞朝官並禁軍都虞候以上

父母妻未有官封者並與封敘已有官封者更與封敘亡沒未封贈者並與封贈已封贈者更與封贈祖父母在願回授者聽應禁軍正副指揮使以上各特與兒男下班祇應一名應承務郎以上服綠緋及十五年不以贓私罪並與改轉服色開封府國學及別試所去年秋試得解舉首特與推恩餘並以今年八月鎖院省試應合特奏名人並與免試內曾經六舉人以上到省人與補登仕郎五舉人與補京府助教四舉上州文學三舉下州文學兩舉諸州助教錫慶院試中在學不係在學生免廷試推恩人諸路解到武藝合格人等並照原降指揮分等參酌推恩應命官除名追降官員及勒停終身不齒放歸田里人等及永不收敘人並與敘元官落職人與復舊職令刑部檢舉奏聞應停降諸色人等未曾敘用者並與特敘元職名其永不收敘人依此以次遷補候有闕收補應配軍因圍閉未出京人候開門日配沙門島並配鄰州見分配在京重役處者仰刑部疾速具元犯取旨放令逐便應逃亡軍

人及潰散人兵除依累降指揮招集出首外尙慮有未及首人可  
特展一月首身其存恤等事並依已降指揮應係官司欠負不以  
名色貫伯並行蠲免其私債無利息者限一年外許理索諸軍緣  
借請之類見克請受者並特與除放耆老並賜粟帛令戶部支給  
償錢官司房錢不以貫伯並放三月出糶米麥雜豆以濟貧民雖  
已降指揮減價尙慮民間不易可令更與減價出糶仍約束逐場  
人民擁併仰戶部踏逐應有係官木植及空閑屋舍添置賣場以  
濟細民無致沮滯掩骼王政所先當草昧圍城之中不忍視其橫  
逆應亡沒貧民仰開封府量給官錢充葬送之費應細民疾病貧  
乏無藥者令開封府疾速措置差官分定坊巷就門俵散官藥諸  
軍疾病合給官藥緣多事之際給散不時仰馬軍司體度速支官  
錢廣行合藥俵散其諸軍差發到軍兵保甲等有疾病者令所轄  
官司依在京軍營法醫治應伎術人等并家屬趨赴軍前者所拋  
下財產其有分人許經開封府自陳驗實給付應寺院宮觀有隔

下發放等恩澤各令自陳所屬保明申禮部限三日給降度牒應特旨還俗僧道特與依舊爲僧道令開封府出給公據應禁宮觀寺尼女冠令所屬取問願歸俗者聽從便應見行法令典章百司事務職任一切並依舊內有于民不便者臺省寺監條具以聞仍許諸色人經鼓院奏陳當議參詳更定以從民欲

建炎以來繫年

要錄參北盟會編

### 張邦昌偽赦手書

海內承平垂二百載生民樂業豈復知兵乃者奸臣輕搆邊難大金再舉奄及都畿城守不堅二帝遷北中原之大踰月無君子適以還歸橫見推逼旣自殘而弗獲乃忍死以救民言念生靈係心宸極道路阻音郵之達吏民無詔令之承想其憔悴之憂同此危亡之急倘不深求於民瘼豈能宏濟于時艱宜示撫循用舒陘阨庶亟臻於甯謐以終究於遠圖可依下項應手書到日昧爽以前罪無輕重常赦所不原者並特釋放

靖康要錄參北盟會編

金吾案北盟會編引中興遺史靖康遺錄  
載張邦昌何赦文二俱與此異附錄于後

天下承平幾二百載百姓樂業豈復知兵奸臣首結邊難招致禍  
變城守不堅致嗣君皇帝越在郊野予以還歸橫見推逼有堯舜  
之揖讓無湯武之干戈四方之廣弗通者半年京城之大無君者  
三月從宜康濟庶拯危難應手書到日罪無輕重並與釋放

一差官省視園陵

二諸州天慶天甯依舊行香

三諸州軍守臣各令兵至近甸保守無虞義同有功起發勤王兵  
仰卻於元來處分屯

四存恤諸處宗室餘並依前赦

中興遺史

宋家遭陽九之厄二帝北遷蒙塵萬里予適以使還強見推立既  
自裁而弗獲乃忍死而救民言念生靈繫心宸極道路阻郵傳之  
問遠近乖向往之誠宜敷德音用罄震宇可大赦天下云云諸道  
勤王人兵當國家危急不能進援京師失守乃欲偷安雖無誠節

亦已勤勞宜各歸本貫別候中旨

靖康遺錄

劉豫僭位肆赦偽詔

門下自前朝失御率土無依內離民心致蠶起弄兵之盜外開邊  
隙來鷹揚問罪之師山川靡甯干戈互動耕桑廢業壠畝彌望而  
荆榛老幼逃生廬舍多爲之灰燼原野厭于流血溝壑填于殘骸  
兵火連年不休亂離自古所少言之流涕念及痛心嗟赤子之無  
辜冀皇天之悔禍宣命亟班於上國郡制特設于東州顧朕何人  
誤承此任自念風猷寡陋家世側微昔也壯年久林泉之是樂今  
焉晚節豈軒冕之爲心屢乞退閑竟無允命提綱五路空殫夙夜  
之勞厯試朞年蔑著錙銖之效雖近地稍形于康乂而遠民未免  
于飢荒方圖自効而歸敢有懷它之望顯冊之旣申命要在必從  
避辭者凡四章無所不至使命愈加乎敦迫軍民不容於遁逃至  
於屬部之州列奏樂推之牘此豈人事致爾實有天數存焉知便  
安難遂於己私則吉凶宜同於民患當天造之草昧念王業之艱

難恭授冊儀尚循牆而欲避勉膺位號若負刺之不遑雖非虞舜  
之明揚幸無成湯之慙德已於天會八年九月九日卽皇帝位國  
號大齊布告中外咸知朕意尚念世道交喪國俗益訛貪頑未變  
於餘風詿誤多罹於憲網力期化洽深軫哀矜宣布湛恩與之更  
始可大赦天下云於戲臨深履薄何以當付畀之隆拯溺救焚何  
以慰來蘇之望尚賴公卿宣力士庶協心共贊眇沖以臻康泰北

盟會編參偽齊錄

### 劉豫求言偽詔

辭避無術竟當重任蒙遠近官吏士庶耆老湊集稱慶願無以能  
副眾誠勤惟極愧惕念時當草昧事極艱難臨政之初若涉大水  
其無津涯更冀官吏軍民耆老凡有所見直言無隱庶補昧陋其  
圖永濟北盟會編參偽齊錄

### 劉豫改元阜昌偽詔

王者受命必建元以正始近古以來仍紀嘉號以與天下更新乃

者卽位之始有司請遵舊制朕以大國之故遜避未遑而使命遠臨促立別號以昭受命之元運新我齊民之耳目嘉與諸夏共承天休其以十一月二十三日建元爲阜昌之元年布告天下咸使聞知

北盟會編參偽齊錄

### 劉豫遷都汴京偽詔

汴京實四方之上游名區輿壤爲天下最今所宜都無以易此而朕以遷都重事未嘗輕議旣而寇盜衰息強梗還歸關輔混同人漸甯謐宅中而據會要因舊以建新都乃其時也朕志已定朝議僉協將戒嚴而順動宜先事以示期誕布詔音亶敷羣聽已定明年春末遷都於汴凡爾遐邇咸知朕意

北盟會編參偽齊錄

### 劉豫寇宋偽詔

朕膺受天命旣作民主遂竭其憂勤撫治中原數年而來治頗有緒永惟吳越巴蜀江湖鎮海皆定議一統之地含齒帶髮莫非臣民閱其陷於僭逆之邦豈不欲速使混一重念大亂之餘生民困



極深加惻隱不忍用兵且冀趙構久自悔悟稍能革其不道故爲之請于大金割江表之地而封之使永保趙氏之祀大金以元議絕滅但欲終其攻伐力請逾堅方獲聽許朕所以施德于江南者顧不厚哉蓋朕以救生靈爲心勉卽大位彼倘能善保一隅不肆殘暴雖分裂土地樹之國都使海內偃兵息民朕之志也豈圖怙惡不悛蔑棄大德乃敢僞通使聘密圖吞噬先乘不備之隙攻劫汝穎後舉烏合之眾侵掠襄鄧至妄肆蜂蠆之毒有收燕雲之謀若尙加含忍則南北億兆生靈無休息安泰之期是用特遣皇太子爲諸路兵馬大總管尙書左丞相梁國公麟領東南道行臺合大金元帥大軍直搗僭壘俘其罪人布宣德音弔彼黎庶務使六合混一永無兵革之虞生民共遂有生之樂播告天下明體至懷故茲詔示想宜知悉

偽齊錄

劉豫獎諭羅誘偽詔

朕乘時創業實賴英父當宁求賢孰爲賢者皇天助順錫我忠良

卿克堅北面之心首建南征之策顧奇謀遠略灼見敵情凡吾師徒皆所毗倚賜卿絹一百疋日下乘傳赴闕以俟登庸朕當親勒六軍式圖厥事果獲戢定樂與卿共之安享太平豈不美哉秋涼比來安好遣書指不多及

北盟會編參偽齊錄

劉豫戒守令勸農偽詔

朕撫有海內五年于茲賤末而貴本欲使元元之民皆趨南畝豐衣足食水旱有儲比至于今田野未盡墾闢閭閻之閒儲蓄尙寡抑亦長民之吏訓督之未至且古者循吏或出入阡陌躬勸耕桑課民樹藝悉有程品用是戶口蕃滋獄訟漸息今郡守縣令所以助朕致理何獨不能及茲適今播種之始亦各勉盡率土之力使地無遺利農民亦宜深念再免兵火之厄泰然更生無事情游竭力田畝務遂生生之業以養父母以育妻子臻于福壽不亦善乎布告天下咸使聞知稱朕敦本務農之意毋忽朕命故茲詔示想宜知悉

北盟會編參偽齊錄

劉豫除李成鎮海軍節度使偽詔

門下授鉞建旄式重兵權之寄折衝禦侮先分閭外之憂思付戎  
麾喜獲虎將宜敷渙號顯告明廷中侍大夫安化軍承宣使鄭州  
守李成智識精明性資果毅戰遇強敵槩貫軍鋒弓縮二鈞矢穿  
鐵騎增摧鋒陷陣之勇立斬將擐旗之功仰察天時俯觀人事拯  
生民之塗炭提士眾以來歸允懷心膂之良增重爪牙之士嗚呼  
賈復提眾以歸漢終成定亂之功尉遲捨偽以存唐屢著擒賊之  
績擬予大將思配前人可特授鎮海軍節度使輔國上將軍充山  
東路留守東平府住坐賜馬五十疋黃金三十斤

北盟會編  
以上原列卷八

金文最卷五目錄

冊文 附劉豫偽冊文

上太祖尊諡冊文 天會三年 見文雅

增上太祖尊諡冊文 皇統五年

上太宗尊諡冊文 天會十三年 見文雅

上景宣皇帝尊諡冊文 天會十三年

上熙宗尊號冊文 皇統元年 見文雅

增上孝成皇帝尊諡冊文 大定十九年

增上睿宗尊諡冊文 大定三年

上世宗尊號冊文 大定七年 見文雅

加上世宗尊號冊文 大定十一年

宣宗遷座德陵冊文 元光二年 趙秉文

上聖穆皇后尊諡冊文 天會十三年

上光懿皇后尊諡冊文 天會十三年

上欽仁皇后尊諡冊文

天會十三年

上明惠皇后尊諡冊文

正大八年  
以上原列卷九

立貴妃裴滿氏爲皇后冊文

皇統元年

立皇子濟安爲皇太子冊文

皇統二年

立楚王爲皇太子冊文

大定八年 見文雅

立原王爲皇太孫冊文

大定二十六年 見文雅

命宋康王爲皇帝冊文

皇統二年

立張邦昌冊文

天會五年

立劉豫冊文

天會八年

進封劉豫曹王冊文

皇統二年

封高麗恭孝王冊文

皇統二年

封高麗光孝王冊文

大定十二年

封高麗元孝王冊文

崇慶元年

封高麗孝成王冊文

泰和五年 見文雅

封長白山神爲靈應王冊文

大定十五年

封大房山神爲保陵公冊文

大定二十一年

封瑪達格山神爲瑞聖公冊文

明昌四年

封靜甯山神爲鎮安公冊文

明昌六年

封混同江神爲應聖公冊文

大定二十五年

劉豫立妻錢氏爲后冊文

以上原列卷十

金文最卷五

昭文張金吾月霄輯

冊文

附劉豫偽冊文

增上太祖尊諡冊文

皇統五年

孝孫嗣皇帝臣名諱謹拜手稽首曰臣聞自昔繼體守文之君嗣服重熙累洽之運念稽圖之綿邈由祖考之艱勤則必茂揚耿光祇薦大號豈惟盡臣子奉先之孝亦以答神祇申命之休故文王肇造周室既以文爲諡而又謂之不顯考又謂之甯王武王克定殷邦既以武爲稱而又謂之光烈考又謂之正父載于大訓是曰王彝粵自遼人不綱上帝降割占烏止于誰屋逐鹿競于中原塗炭之危玉石無辨我太祖武元皇帝遵養時晦顧諟天明以德行仁勢靡憑于力假奉辭伐罪攻不自于我先方秉鉞以誓師泊臨津而飲馬神光赫然四燭輝甚朝暎天塹爲之伏流坦如平地故得警民禡魄鄰壤歸心牧野前徒俄倒戈而自潰霍邑固守望舉

鞭而已摧自是歲冒風霜躬擐甲胄其至有如時雨其攻無復堅  
城未踰數載之間盡取五京之地北連六鎮南界九河西懾崆峒  
東漸溟渤若遠若近悉主悉臣至于圖任親賢倚如手足懷服歸  
附推以腹心有典有則以垂裕于子孫無黨無偏以示公於好惡  
惡衣服卑宮室夏禹之無閒然也不邇聲色不殖貨利成湯之又  
日新也治監太清簡易爲政羲昊之淳風也德崇克讓推授靡私  
唐虞之高躅也若乃仁恩光被於有截智慮預圖于未形禮義所  
維威信所接卜世之久與天無窮臣嗣守丕圖恪繩遺矩念欲報  
之懷曷已而追崇之禮未加想如在之音容懍勿甯於朝夕率籲  
眾志參稽格言咸謂道合於天至謂之元與證議同雖地溥天崇  
固不容于測度而涓流塵集冀少益於高深臣不勝大願謹奉玉  
冊玉寶恭上尊諡曰應乾興運昭德定功睿神莊孝仁明大聖武  
元皇帝恭惟神用無方天監在下察冲人之永慕歆兆姓之樂推  
風馬雲車俯故宮而暫憩金文玉篆揚景鏢於無窮



上景宣皇帝尊諡冊文

德高聖人而無其位裕在後昆子有天下則歸所尊古隆此禮故  
周武追王於文考漢宣正位于悼皇皆所以奉亡如存飾終昭遠  
昊天欲報誠難究于生成大道無名或強加其稱謂方改園陵之  
卜宜新簡冊之輝伏惟皇考性稟乾剛望崇震嫡廓有大度鬱爲  
英風安民之志出自妙齡幹國之功流于今日肇邦有夏雖由湯  
后之勃興舉事亡隋實賴秦王之早計初自義旗旣建戎輅徂征  
提銳旅以偕行誓羣豪而先倡謀猷克壯騎射兼能決機事則不  
疑見大敵而愈奮長于將將萬夫之政不足觀意在賢賢一个之  
善未嘗失人惟幹蠱士勇同仇濯濯威聲遂成德畏桓桓忠節率  
自孝移遂協濟於天功俄永清于海內辰極旣正匕鬯宜歸文帝  
至公輒拒有司之請與夷善讓終推仲父之賢視天下以若遺曾  
胸中之不介歷古無幾非聖而何若乃朝夕問安左右致養勤而  
不懈樂且有餘宗族皆以孝稱昆弟未嘗言閒其直也正人之曲

其質也安俗之淳儼若神明莫之敢犯坦無城府亦以易從富貴不驕聲色不溺與人同羽旄之樂處躬無彫峻之華賢愚莫遁於聰明善惡必期於進退虛徐戒智者之察隱卹知小人之艱蓋惟道以是從誠不聞而亦式天資至德備眾美而無得稱地本元良在羣情之實所係何禮象之告變遽靈儀之上賓九族爲之痛心百姓嗟乎無祿自惟冲幼夙遭閔凶頃以眇身猥承大統雖太宗大義之及此實昭考餘休之至然十二載之于令無從所怙萬一分之有咎豈可弗爲用罄厥圖莫知攸稱稽合前世詢逮羣工咸謂論以孝思大者莫如嚴父求之禮意卑則不可臨尊尙微稱以未加實大典之有闕是用自上帝以請命令元龜而卜辰將垂萬世之休奉聯二聖之號謹遣攝太尉皇伯尙書令丞相都元帥宗翰奉玉冊玉寶上尊號曰景宣皇帝廟號徽宗

大金集禮

增上孝成皇帝尊諡冊文

大定十九年

維年月日嗣皇帝臣名仰惟太祖武元皇帝命于帝庭神武撥亂

用肇造我區夏顧命之際聖子咸在舍弗以立舉天下大器授之  
太宗文烈皇帝暨天會末命亦弗敢弭忘曰茲先皇令德光昭則  
能賢乃簡畀世嫡神孫丕承基緒十有五年德厚功著厥初封建  
齊人大河之南俾顛綏靖乃罔念付託以率割爲政彼民大弗克  
堪且勤我戍守無有甯歲尙安用而國肆命廢黜于是西踰熙洮  
東極海泗南則唐鄧咸歸我輿圖事不貳適休烈增光于先朝茲  
不曰宏基乎廢宋之餘假息江表我伐再張莫不震疊至籲哀請  
命稱臣底屬乃班師振旅柔服以示懷錫之封冊歲底厥貢七德  
具備茲不曰纘武乎垂拱仰成于懿親宗公穆穆皇皇尊嚴若神  
莊矣黜華尙實元默不言如天之行四時靖矣若稽古假有廟尊  
祖敬宗寅念祀事孝矣綏萬邦屢豐年惟民其康乂成矣豈圖遭  
閔永懷靈傷以迄于今惟沖人繩其祖武蒸蒸業業思所以駿惠  
顧立愛立敬有尊有先莫重于宗廟之享竊惟公則生明名正則  
言順自非推本武元文烈以大義至公相傳授之意用鋪張揚厲

天眷皇統之閔休偉績則何以對越二聖在天之靈雪神孫無窮之遺憾哉不勝大願謹遣攝太尉臣某奉冊上尊諡曰宏基繼武莊靖孝成皇帝廟號閔宗伏惟神靈格思膺是典冊頓首頓首謹言

大金集禮

增上睿宗尊諡冊文

大定三年

臣聞自昔垂訓後世作範故父有天下傳之于子子有天下尊歸于父是以周武克商始制追王之典炎劉興漢方崇太上之名百王相因事貴稽古惟我聖考佐佑祖宗取亂攻昧闢土開基天戈所麾畏威而効順仁澤所被懷德而歸心鄰國興俟后之謠筆食致迎師之奉遠邇百姓甯居安業避焚溺于水火足衣食于耕桑皞皞熙熙蓋數十年于茲矣臣猥以眇躬起膺推戴仰念祖宗之丕緒俯察黎庶之誠心君臨萬方凜若御朽敬慎伊始罔敢怠遑載惟與天同功流慶有自行宗社無疆之福發本支百世之祥實聖考允文允武克寬克仁上合天心下從民欲天祿淵源之積匪

一日也爰訪邈臣博採羣議咸謂云云證議同舉此大綱形容具

美僉言既允祇薦鴻名顯揚之微心潛天貺臣不勝大願涓擇吉日遣攝太尉特進平章政事兼太子太師定國公臣完顏宗憲奉玉冊玉寶奉尊諡曰立德顯仁啟聖廣運文武簡肅皇帝廟號睿宗恭惟謨烈有光音容如在俯鑒守成之志尙貽垂裕之休典冊一新昭示萬世大金集禮

加上世宗尊號冊文

大定十一年

李石

聖人大德必得其名天下懽心以奉其上蓋千歲所接之統是二者相須而成若稽詩書之格言具載帝王之能事巍巍之治發見于都俞赫赫之功形容于雅頌其有賡歌帝作對揚王休匪今則然其來尙矣恭惟祥發上帝統承武元申命用休從民所欲當正隆之失馭聖緒幾危自華表以飛龍皇綱載整方是時也遼餘孽寇肆逆滔天江左新君寒盟爭地爰赫斯怒以修我戎俾凶渠授首以勢窮遐裔革心于理曲蓋天之所助者順而邦其永孚于休

然後體乾元以長人法辰極之居所仁不遠異德惟日新聖而無所不通孝則昭哉嗣服固已鋪閱休揚偉蹟建顯號薦尊名大惟充實之有光未究殊尤之絕跡若夫兢兢業業思政之恆穆穆皇皇臨朝之肅禮法自國貴始威儀作民恭先於其禴祠烝嘗必以齋莊中正憲唐虞之稽古監夏殷以從周大報年豐肇稱郊祀社稷宗廟罔不肅祗山川羣官于茲望秩馨香薦其明德禮樂備于太平惟其學有緝熙是以化成經緯至于齎載之內聲教所加共惟帝臣莫非王土南訛朔易時靡有爭西暨東漸罔不率俾亦由有常德以立武事耀神武以折遐衝如霆如雷于疆于埴堯項之陪臺稱亂詔始問而伏誅柔然之種落不庭兵一征而獲醜事無遺策師不踰時四海永清諸福畢至故臣民咸尙其慶謂德業有光于前由是稽首颺言竭誠歸美神功不宰蓋亦強爲之名聖度能兼僅得勉俞其請臣以爲懋敬厥德之謂欽化成天下之謂文無思不服之謂廣功成止戈之謂武臣等不勝至願謹奉上玉冊

玉寶加上尊號曰應天興祚欽文廣武仁德聖孝皇帝 大金集禮

宣宗遷座德陵冊文

元光二年

趙秉文

維元光二年歲次癸未十二月己巳朔二十二日庚寅宣宗繼天興統述道勤仁英武聖孝皇帝崩于甯德殿二十八日丙申移殯于大慶殿之兩楹越正大元年三月戊戌朔二十三日庚申遷座於德陵禮也律琯餘寒銅壺未曙慘玉殿之凝霜尙金盤之承露一夕晏出萬里縞素百官血出以如失萬姓風號而靡訴嗟何辜兮考喪差不勝其孺慕哀子嗣皇帝臣痛聖駕之長違哀仙遊之不歸奉綴衣而如在瞻黼展而成非上宰庇司羣公就列覽象物之旣陳悵徽音之永隔乃命詞臣流芳寶冊其詞曰

大金受命傳休累聖薄海內外罔不稟命大安失御不獨厥政胡馬南牧華風不競皇天祐正命我真人裕陵元子世宗神孫睿謀經遠深略緯文聰明齊聖慈和儉勤欽若帝則駿惠先功科條霜雪號令雷風尊禮百神升秩元祀體貌大臣賓禮名士鰥寡惠鮮

冤滯申理從善如流愛民如子給廩養士闢館集賢罰從未減賞  
惟慶延屯利建侯萃享有廟金壯京城泥封關徼至于赦赤子之  
弄兵誅師干之失律恩不閒于疎遠罰不阿于親戚降虜效順以  
革心島夷畏服而獻馘堂上之兵不殺目中之虜如擊方將歸馬  
大漠洗兵中原重新日月再造乾坤吁嗟昊天不弔何言至矣哉  
勤勞天下兮既如彼恩結人心兮又如此胡不萬年僅周一紀禱  
方致于金滕命忽宣于玉几嗚呼哀哉杞國天崩不周地缺寒日  
無光蒼天改色綃幕褰兮凝霜麻衣集兮如雪淚成雨兮萬木冰  
哭成雷兮九泉咽嗚呼哀哉龍輻徐動霓旌前引柳絮漸遙薤歌  
猶挽背天闕之崇峻卽神皋之平行烏號斷口鼎湖成白雲悠兮  
帝鄉遠邈馳道而皆迴獨宮車兮不返嗚呼哀哉天柱兮崇山虎  
踞兮龍盤千秋兮萬代永閤兮宸顏藏衣冠于天上遺聲烈于人  
閒去復去兮九疑黯來不來兮八駿閑嗚呼哀哉如天之生如日  
之明神武電斷蠻夷震驚繩祖武兮孝之大興聖統兮功有成至



德難名神謀莫測超咸五而登三慚漏萬而掛一宜乎享號曰宣揚鴻休于罔極嗚呼哀哉

邊水集

上聖穆皇后尊諡冊文

天會十三年

二月十一日乙卯孝孫嗣皇帝臣諱謹再拜稽首言曰臣聞正位麗極肇造我家者必資淑聖然後成帝王之功考諡定名昭示厥後者非薦徽尊無以見后妃之德繫國朝之令著今古之彝儀伏惟太母博厚配天貞明齊日安順靜懿肅雍塞淵開王化以始基篤大倫而正本慶流者遠挺生胄族之華善德在躬秀發閭閻之妙言爲圖史動合箴規鏘璜瑪以和鳴容皆中節飾紘縵而整治藝則生知粵自高門言歸烈祖時屬經綸之際進膺窈窕之求禮未備于造舟志已躬於服泮義爰六子資生允賴于坤儀周亂十人同德莫先於文母體參龍躍祥發燕謀贄榛栗以告虔薦蘋蘩而昭信必敬必戒至靜至柔教以身而先人化自家而刑國琴瑟在御副禱以朝若媯汭之嬪虞用全舜孝邁塗山之興夏實佐

禹功有開必先篤生皇考立子以適肆成渺躬永惟輔佐之憂勞  
既勤祖構宜享治安之逸樂遽棄母儀迄茲纂承彌極攀慕弗獲  
逮事徒瞻服飾之山河未究推尊有感烝嘗之霜露是以秉鈞元  
老蒞禮碩儒謀皆一辭龜得吉卜請奉長秋之號追嚴厚夜之藏  
強爲之名道或存於擬議俄而可測功豈盡于形容謹遣攝太尉  
皇叔祖大司空昱奉玉冊玉寶上尊諡曰聖穆皇后伏惟皇靈在  
天景福昌後衣冠原廟聿從高帝之遊松柏闕宮寅奉姜嫄之祀  
名貽不朽德播無疆嗚呼哀哉

大金集禮

上光懿皇后尊諡冊文

天會十三年

二月十一日乙卯孝孫嗣皇帝臣諱謹再拜稽首言曰臣聞塗山  
儷禹史稱啟夏之功莘國配文詩播興周之美洪惟令德夔掩前  
芳苟非著勤崇垂後之功何以申報本飾終之孝若稽典則允協  
神人恭惟皇后挺生名家來符興運稟是柔嘉之性形爲貞靜之  
姿早以賢稱遂爲聖偶窈窕率禮藹關睢淑女之風儆戒持心得

雞鳴賢如之道我烈祖登大寶之始而太母正中宮之尊助日宣  
光配天居體躬蘋蘩以奉宗祏服澣濯以訓宮庭至于敬老尚賢  
矜孤閔乏嘗聞國論言必有稽閒預兵機謀無不中歷覽千古寶  
惟一人志存社稷之深澤溢子孫之遠逮膺纘紹彌用追懷悵懿  
範之永違恍徽音之如在致四海之養既弗及於承顏備萬物之  
儀固無能于稱德尚書政府宗伯禮官僉謂移御舊宮升祔世室  
宜刺六經之載用光百世之傳謹遣攝太尉皇叔祖大司空昱奉  
玉冊玉寶上尊諡曰光懿皇后伏惟俯納精誠昭膺懿號珠襦玉  
匣陪弓劍於軒臺風馬雲車從衣冠於漢廟永綏純嘏幽贊丕圖  
嗚呼哀哉謹言

大金集禮

上欽仁皇后尊諡冊文

天會十三年

八月二十一日乙巳孝孫嗣皇帝臣諱謹再拜稽首言曰昔我皇  
祖誕膺天命肇造區宇用垂統于後世至於太宗聰明勇智克篤  
先烈迄用有成聲教暨于朔南仁恩被于動植天監厥德用錫無

疆之休雖簡在帝心本自神聖而輔佐憂勤實與有力恭惟大行  
太皇太后神靈毓粹圓魄儲精作合皇家儷體宸極儉以約已勤  
以率人陰教行于六宮素風表于千祀用能體資生之道助播物  
之功四海莫不蒙仁二儀于焉饗德雖塗山啟夏渭涘興周無以  
專其美也及先皇厭代哀戚過禮就養東朝德輝彌耀顧性寡昧  
嗣守丕基方賴慈訓庶臻于理而昊穹弗憖大數俄及惘然追懷  
哀恫曷已今者卜筮告吉因山有期爰制近司請明舊典惟舉位  
以定名考諡以尊德所以揚茂美而傳休聲由周而來率用是道  
庶憑徽號以稱褒崇謹遣太尉行會甯牧鄭國王臣裴滿達奉冊  
寶上尊諡曰欽仁皇后伏惟聖靈在天令名不朽光配清廟永世  
無疆嗚呼哀哉謹言

大金集禮

上明惠皇后尊諡冊文

正大八年

維正大八年歲次辛卯十一月癸未朔初八日庚寅哀子嗣皇帝  
臣言昔我烈考宣宗皇帝以裕陵元子復受天命遷遷正統紹復

武元之大業亦惟我大行慈聖皇太后來嬪于京天作之合憂勤  
輔佐用其濟于艱難厥初誕育眇躬將正位號以仁聖皇太后德  
冠六宮曰娥英之貴一也讓而不居逮元光末命弗敢弭忘曰此  
先帝之志也乃居太上之尊受養于長樂之宮肆惟冲人嗣無疆  
大厯未堪家難思免厥愆尙賴文母之慈訓不圖昊天不憖降此  
大喪創巨痛殷煢哀茹荼追念宸儀雖闕徽音尙存欽惟聖母慈  
仁賦性勞勤夙夜以國步方棘憂心孔疚顧黎民曰念哉征戍勞  
止汜可少休吾母天下忍瘠其子凡諸疾禱皆歸福于元元疾迫  
彌留遺命薄葬臣哀痛不忍從重違顧命伏念正位以定名考謚  
以尊德厥有舊章倘非丕彰聖母之鴻休懿德則何以對越在天  
之靈慰孝思罔極之勤哉深詔禮官詳議謚法式稽古義敢薦大  
名伏以蘊先物之幾體懷冲之德紫宮竝耀黃道偕升茲不曰明  
乎以載物之量包逮下之仁子惠無疆坤儀攸贊茲不曰惠乎謹  
按謚法獨見先識曰明恩能及下曰惠肅涓穀旦爰舉上儀謹奉

玉冊玉寶上尊諡曰明惠皇后伏冀聖靈俯賜鑒臨歆受典冊垂裕無窮嗚呼哀哉謹言

以上原列卷九 皇統元年

立貴妃裴滿氏為皇后冊文  
皇帝若曰夫地承天而效法所以合德無疆月遡日而生明故能容光必照是以有國有家者必選立嘉配以上承宗廟而降德于臣民古今一也我國家累聖重光開基垂統用端命于上帝亦惟內德相繼匹休姜任燕謀所貽敢忘紹述咨爾裴滿氏柔惠端淑得于天成發慶鍾祥世有顯聞自越初載來嬪潛邸笄珈組率履無違逮朕纂服章明婦順表率勤劬陰教修明雖已崇建位號而典冊未舉朕意歎然今遣太尉裴滿胡達攝司徒昂持節授爾冊寶副禕重翟宏費用光備物充庭一遵古禮朕惟王業所基率由內治和睦自中化馳如神爾克勤人用弗敢棄日爾克儉人用弗敢崇侈爾克正人用弗敢迂乃心倚乃身勉思其終惟慎乃濟天其申命于我家爾亦永膺多福豈不臧歟

大金集禮

立皇子濟安爲皇太子冊文

皇統二年

禮典之垂訓鑒重世嫡所以丕敘人倫帝王之御邦家建儲闡所以其承宗廟朕紹隆基緒祗慎夙宵荷三靈眷顧之休開億載流光之福自中宮而錫羨慶上嗣之應期厯修曠世之儀豈厭普天之意誕敷庭號播告縉紳皇子濟安毓秀天潢分輝辰極寢興占夢稔聞漢后之日符經緯儲精允協周家之聖瑞沈厚積山川之氣溫文全金玉之姿乃者元宰獻謀近臣演議謂前代少陽之兆多育于朱藩而後宮甲觀之徵不專于椒掖尙預崇于國本以外係于人心豈如皇朝盡軼隆古宜涓歲月之吉茂揚典冊之光上以答祖考之歡下以副臣民之望言之甚切義不得辭肆因翦鬻之辰俾正承華之位方當延老成爲羽翼之輔建僚案相朝夕之恭匪我一人之私惟爾萬方之慶於戲僉言協卜旣從蚤建之功幼歲親師庸助夙承之德宜非謀非彝之勿用廣正言正事之常聞勉思求稱之難永錫無疆之福

大金集禮

命宋康王爲皇帝冊文 皇統二年

皇帝若曰咨爾宋康王趙構不弔天降喪於爾邦亟瀆齊盟自貽顛覆俾爾越在江表用勤我師旅蓋十有八年于茲朕用震悼斯民其何罪今天其悔過誕誘爾衷封奏狎至願身列於藩輔今遣光祿大夫左宣徽使劉筭等持節冊命爾爲帝國號宋世守臣職永爲屏翰嗚呼欽哉其恭聽朕命 金史

立張邦昌冊文 天會五年

維天會五年歲次丁未二月辛亥朔二十有一日辛巳皇帝若曰朕惟我太祖武元皇帝肇造區夏務安元元肆朕纂承不敢荒怠夙夜兢兢思與萬國同格于治粵惟有宋實乃通鄰貢歲幣以交歡馳星輶而講好期于萬世永保無窮蓋我有大造于宋也不圖變誓渝盟以怨報德構端招禍反義爲仇譎詐成俗貪婪不已加以肆行淫亂不恤黎元號令滋彰紀綱弛紊况所退者非其罪所進者非其功賄賂公行豺狼塞路天厭其德民不聊生而又姑務



責人罔知省己父既無道于前子復無斷於後以故徵師命將伐  
罪弔民幸賴天高聽卑神幽燭細旌旄一舉都邑立摧但眷命攸  
屬謂之大寶苟厯數改卜未可偷安故用黜廢以昭元鑒今者民  
既乏主地宜混同然念厥初誠非貪土遂命帥府與眾推賢僉曰  
大宰張邦昌天毓疏通神姿睿哲處位著忠良之譽居家聞孝友  
之名實天命之有歸乃人情之所僣擇其賢者非子而誰是用遣  
使特進尙書左僕射同知樞密院事監修國史上柱國南陽郡開  
國公食邑三千戶食實封二百戶韓資政副使榮祿大夫行尙書  
禮部侍郎提點大理寺護軍譙國縣開國侯食邑一千戶食實封  
一百戶曹說持節備禮以璽紱寶冊命爾爲皇帝以授斯民國號  
大楚都于金陵自黃河以外除西夏封圻疆場仍舊世輔王室永  
作藩臣貢禮時修爾勿疲於述職問音歲至我無緩于披誠於戲  
天生蒸民不能自治故立君以臨之君不能獨理故署官以教之  
乃知民非后不使后非賢不守其于有位可不慎歟予懋乃德嘉

乃丕續日慎一日雖休勿休往欽哉其聽朕命北盟會編參大金

立劉豫冊文天會八年

維天會八年歲次庚戌七月辛丑朔二十有七日丁卯皇帝若曰朕聞公于御物不以天下爲己私職在牧民迺知王者爲公器威罰旣已殄罪位號宜乎授能迺者有遼運屬顛危數窮否塞獲罪上帝流毒下民太祖武元皇帝杖黃鉞而拯黔黎麾白旄而誓軍旅妖氛旣掃區宇式甯爰有宋人來從海道願輸歲幣祈復漢疆太祖方務善鄰卽從來議豈期天方肇亂自啟釁階陰結叛臣賊虐宰輔招集姦慝擾亂邊陲肆朕纘承仰循先志姑存大體式示函容迺復蔽匿逋逃夸大疆域肆其貪很自起紛爭擾吾外屬之藩鄰取其受賜之疆土因彼告援遂與解和終莫聽從巧爲辭拒爰命將帥諠諭盟言許以自新終然不改偏師傳汴首罪奔淮嗣子哀鳴請復懽好地畫三鎮誓卜萬年凡有質要悉同父約旣而

官軍未退夜集眾以犯營誓盟纔乾密傳檄而堅壁私結使人陰  
構事端以故再遣師徒詰茲敗累又起畫河之議復成款戰之謀  
既昧神明迺昭元鑒京城摧破鼎祚淪亡無併爾疆以示不貪之  
德止遷其主用彰伐罪之心建楚新封守宋舊服庶能爲國當其  
息民不料懦夫難勝重任妄爲退讓反陷誅鋤如構者宋國罪餘  
趙氏遺孽家乏孝友國無忠勤銜命出和已作潛身之計提兵入  
衛反爲護己之資忍視父兄甘爲俘虜事雖難濟人豈無情方在  
殷憂樂稱僭號心之幸禍於此可知乃遣重兵連年討捕比聞遠  
竄越在島夷重念斯民亂於無主久罹塗炭未獲昭蘇不委仁賢  
孰能保定咨爾中奉大夫京東西淮南等路安撫使兼諸路馬步  
軍都總管知東平府節制大名開德等府濮博濱棣德滄等州劉  
豫夙擅直言之譽素懷濟世之才居於亂邦生不遇世百里雖智  
亦奚補於虞亡三仁至高或願從於周仕當姦賊擾攘之際正愚  
氓去就之閒舉郡來王奮然獨斷逮乎歷試厥勳克成委之安撫

德化行任之尹牧獄訟理付之總戎盜賊息專之節制郡國清況  
有定衰救亂之謀必挾拯變扶危之策使民無事則彘弓力穡有  
役則釋耒荷戈罷無名之征捐不急之務徵隱逸舉孝廉振紀綱  
修制度省刑罰而去煩酷發倉廩而息蠹螟神人以和上下協應  
比下明詔詢考輿情列郡同辭一心仰戴宜卽始歸之地以昭建  
業之元是用遣使留守西京特進檢校太尉尙書右僕射大同尹  
兼山西兵馬都部署上柱國廣陵郡開國公食邑二千戶實封二  
百戶高慶裔副使金紫光祿大夫尙書禮部侍郎知制誥護軍南  
陽縣開國侯食邑一千戶實封二百戶韓昉備禮以璽紱寶冊命  
爾爲皇帝國號大齊都於大名府世修子禮永貢虔誠錫爾封疆  
並從楚舊更須安集自相攸居爾其上體天心中從人欲忠以藩  
王室信以保邦圻惟天難諶惟命靡常常厥德保厥位爾其勉哉  
勿忽朕命

北盟會編錄  
參建炎以來繫年要錄

大金國志大金弔伐

進封劉豫曹王冊文

皇統二年

門下嚴寶冊以薦鴻名既俯從於眾欲布恩書以敷霈澤宜大渙  
于羣生眷子異姓之王夙有同寅之德肆班明命孚告治朝蜀王  
劉豫敦大而直方高明而寬厚早居南服以直言強諫聞於時頃  
在東州以智略英姿長于眾八年享國一節事君審運會之有終  
識廢興之大義視去位如脫屣以還朝若登仙向之富國以強兵  
何霸王之足道今也樂天而知命豈得喪之能移爰因慶賞之行  
益示褒封之典胙以陶邱之壤易其井絡之封於戲列土以建侯  
邦誓以堅於帶礪盡忠以藩帝室心宜炳若丹青茂對寵光永綏  
福履可進封曹王食邑一萬戶食實封一千戶仍令有司擇日備  
禮冊命主者施行

北盟會編

封高麗恭孝王冊文

皇統二年

昔先王疆理天下錫命六服率爾世守用丕協于大公肆朕君臨  
若稽隆古亦惟崇德象賢以奉若天道咨爾楷英氣邁往淑質純  
茂粵自早歲以孝友誠敬事親有聞述其纘承祗德彌邵眷爾先

哲克篤忠貞以謹事大邦懷保惠訓載祀數百用貽燕于爾躬爾亦迪知忱恂夙夜兢業芟刈崇激式克敬典乃增裕於前烈朕甚嘉之越茲旣累年而典冊未稱大懼佛鬱公議今遣使持節冊命爾爲儀同三司柱國高麗國王永爲我藩輔嗚呼惟天難忱惟命不于常人之攸好德降之百祥義之庸強自取弱勿矜于貴勿溢于富勿敢怠于宴康聽予一人之彝訓以饗受多福其以有民世享豈不偉歟

高麗史

封高麗光孝王冊文

大定十二年

崇德象賢若稽于古承家開國以正其功粵惟表海之舊封未艾如川之多祚所從來遠雖子孫勿替其傳惟不于常有兄弟相及之道世將于是享德人亦宜無閒言爰契師虞往敷天寵咨爾皓遠大以爲任賢明而自將地處彼邦之懿親才雄爾眾之令望繫乃祖乃父實維藩維垣前列用宏嗣賢不乏蓋根深則枝茂積厚者流光餘慶曷歸汝躬是任屬友于之疾其殆不瘳推公爾之心

自爲克讓申以敷奏達于聽聞是成斯美於大倫代厥後於先正  
今遣使命爾爲開府儀同三司高麗國王永爲藩輔嗚呼社稷旣  
有所授夙夜罔或不勤律乃邦民謹爾侯度禍福惟人所召切戒  
于淫佚驕邪夙夜畏天之威庶可以安甯長久罔曰弗克惟旣厥  
心往哉惟休無替朕命

高麗史

封高麗元孝王冊文

崇慶元年

朕操馭貴之資職代天之命凡預疏榮之列必崇過厚之恩矧爾  
東藩謹乃侯度頃屬受承之際克敦揖讓之風載閱來章特從允  
許權高麗國事王禩性資愷悌學問淵源內推樂善之誠外蔚好  
賢之望稽之理命則有協假以政權則克勝使付囑者得稱知人  
傳授者果爲有託顧茲一舉豈非兩全是用正爾眞封豐斯親渥  
於戲摠山海五部畀之茅社加車服九命煥其旂章尙肩忠蓋之  
心益體寵綏之意勉修爾職祗服朕言可特授開府儀同三司上  
柱國高麗國王食邑一萬戶食實封一千戶仍令有司擇日備禮

冊命 高麗史

封長白山神爲靈應王冊文 大定十五年

惟年月日皇帝若曰自兩儀剖判山嶽神秀各鍾於其分野國將  
興者天寶作之對越神休必以祀事故肇基王迹有若岐陽望秩  
山川于稽虞典厥惟長白載我金德仰止其高實惟我舊邦之鎮  
混同流光源所從出秩秩幽幽有相之道列聖蕃衍熾昌迄于太  
祖神武徵應無敵於天下爰作神主肆予冲人紹休聖緒四海之  
內名山大川靡不咸秩矧王業所因瞻彼旱麓可儉其禮服章爵  
號非位于公侯之上不足以稱焉今遣某官某持節備物冊命茲  
山之神爲興國靈應王仍勅有司歲時奉祀於戲廟食之享亙萬  
億年維金之楨與山無極豈不偉歟 大金集禮

封大房山神爲保陵公冊文 大定二十一年

維年月日皇帝若曰古之建邦設都必有名山大川以爲形勝我  
國家既定鼎於全燕西顧郊圻巍然大房秀拔混厚雲雨之所出



邱墟萬民之所瞻仰祖宗陵寢於是焉依仰惟嶽鎮古有秩序皆載祀典矧茲大房豈可獨闕其禮哉其爵號服章俾列于侯伯之上庶足以稱今遣某官某備物冊命茲山之神爲保陵公申勅有司歲時奉祀其封域之內禁無得樵採弋獵著爲憲令使草木禽蟲各遂其性所以廣先聖之德澤而報神之功也於戲享之廟食錫乃多儀祐列聖以安安期億年而有永以篤金祐時爲神休大

金集禮

封瑪達格山神爲瑞聖公冊文

明昌四年

皇帝若曰國家之興命厯攸屬天地元化惟時合符山川百神無不受職粹精薦瑞明聖繼生著丕應於殊禎啟昌期于幽贊哀對信猶之典咸修望秩之文嘉乃名山奠茲勝地下綿乾分上直樞輝盤析木之津達中原之氣廓除氛禳函毓太和仰惟光烈昭垂徽音如在卽高明而清暑克靜嘉以安仁周廬安甯厚澤浹洽朕祗循祖武順講時巡感美號以興懷佩聖謨而介福言念誕彌之

初度抑由翊衛之效靈然猶祀秩無章神居不屋非所以盡崇德報功之義副追始樂原之心爰飾名稱載修祠宇勒忱詞于貞石涓良日于元龜彰物采以辨威潔廢縣而致祭闡揚茂實敷繹多儀今遣使某副某持節備物冊命神爲瑞聖公仍勅有司歲時奉祀於戲尙有聰明歆此誠意孚休惟永亦莫不甯

金史

封靜甯山神爲鎮安公冊文

明昌六年

皇帝若曰古之名山咸在祀典軒皇之世神靈所奉者七千虞氏之時望秩每及于五載蓋惟有益于國是以必報其功逮乎後王申以徽冊至于嶽鎮之外亦或封爵之加故太白有神應之稱而終南有廣惠之號禮由義起事與時偕載籍所傳于今猶監朕修和有夏咸秩無文眷茲靜甯秀峙朔野縕澤布氣幽贊乎坤元導風出雲協符乎乾造一方之表萬物所瞻南直都畿北維障徼連延廣厚寶藏攸興盤固高明諺宮斯翼昔有遼嘗恃以富國迄大定更爲之錫名洪惟世宗功昭列聖亦越顯考德利生民爰卽歲

時駕言臨幸兵革不試遠人輯甯雨暘常調品彙蕃庶此上帝無疆之貺亦英靈有相之符比卽輿情載修故事顧先皇帝駐蹕之地揖累世承平之風迓續遺休式甄神祐肆象德以畀號仍班台而闡儀宇像一新采章具舉今遣使某副某持節備物冊命神爲鎮安公仍勅歲時奉祀於戲容典焜燿精明感通惟永億年翊我昌運神其受職豈不偉歟

金史

封混同江神爲應聖公冊文

大定二十五年

昔我太祖武元皇帝受天明命掃遼季荒蕪成師以出至于大江浩浩洪流不舟而濟雖穆滿渡江而鼉梁光武濟河而水冰自今觀之無足言矣執徐之歲四月孟夏朕時邁舊邦臨江永歎仰藝祖之開基嘉江神之効靈至上都議所以尊崇之典蓋古者五嶽視三公四瀆視諸侯至有唐以來遂享帝王之尊稱非直後世彌文而崇德報功理亦有當然者矧茲江源出于長白經營帝鄉實相興運非錫以上公之號則無以昭答神休今遣某官某持節

備物冊命此江之神爲興國應聖公申命有司歲時奉祀於戲嚴  
廟貌正封爵禮亦至矣惟神其衍靈長之德用輔我國家彌億年  
神亦享廟食於無窮豈不休哉

大金集禮

劉豫立妻錢氏爲后冊文

門下朕肇造區夏聿崇王化之基正位宮闈允賴坤儀之助爰昭  
懿範協建丕圖敷告明廷誕揚顯冊咨爾錢氏性鍾婉靜德茂肅  
恭嬪于節制之初嘉爾宜家之美慶傳乃祖德及于民啟吳越之  
王封衝斗牛之瑞氣名家濟美遠踰高密之門邦媛流芳益顯臨  
安之裔建茲創業繫乃協心增厚人倫思繼關雎之化敬修婦禮  
欣承長樂之歡宜正徽名式資內治禕衣綸翟遠稽周室之儀椒  
屋蘭閣靡效漢家之侈蓋遵典禮匪徇恩私於戲惟守恭儉可以  
御純樸之民必務憂勤可以副勵精之意書稱媯汭匹虞舜以膺  
圖詩詠洽陽配周王以受命勉師令德永播徽音可立爲皇后仍  
令有司擇日備禮冊命施行

北盟會編參偽齊錄  
以上原列卷十

